

## DOMINGU V KUAREZMA – TINAN C

### Tema

Liturjia ohin nian ko'alia dala ida tan kona-ba Maromak ida ne'ebé hadomi no ninia domin sadik ita atu hakat liu ita-nia eskravidaun sira hodi to'o ba moris foun, ba moris-hi'as. *Leitura dahuluk* aprezena mai ita Maromak libertadór, ne'ebé akompaña nia Povu ba liberdade. “Dalan” ne'e mak paradigma libertasaun nian ne'ebé Maromak konvida ita atu halo iha tempu Kuarezma nian no lori ita ba “Rai Promesa” nian iha ne'ebé bele hetan moris foun.

*Leitura daruak* mak dezafiu ida atu liberta an husi “foer” ne'ebé impede deskoberta kona-ba buat ne'ebé fundamentál: komuñan ho Kristu, identifikasaun ho Kristu, prinsípiu moris-hi'as nian.

*Evanjellu* dehan mai ita katak, tuir Maromak nia perspetiva, la'ós kastigu no intoleránsia mak rezolve problema salan no aat nian: domin no laran-sadia mak hamosu moris ho modu ativu no hamoris ema foun. Ida-ne'e mak lójika Maromak nian, ne'ebé ita simu konvite atu asume iha ita-nia relasaun ho maun-alin sira.

### LEITURA I – Is 43,16-21

Deutero-Isaías (autór testu ne'e nian) mak profeta anónimu ida, husi eskola Isaías nian, ne'ebé kumpre misaun entre ema desterradu sira. Ita iha sékulu VI mK, iha Babilónia. Judeu sira ne'ebé moris iha desterru frustradu no lakon dalan, basá libertasaun Maromak nian la to'o de'it, hanesan Maromak haluha tiha nia Povu. Sira mehi kona-ba ézodu foun, iha ne'ebé Jahwéh hatudu An dala ida tan, hanesan Maromak libertadór.

Iha parte dahuluk “livru konsolasaun nian” (Is 40-48), profeta hato'o katak libertasaun besik daudaun ona no kompara Povu nia saida husi Babilónia hodi filafali ba Rai Promesa hanesan ézodu husi Ejitu. Iha kontestu ida-ne'e mak ita tenke enkuadra ita-nia leitura dahuluk ohin nian.

### MENSAJEN

Profeta nia liafuan sira (orákulu) hahú hodi fó hanoin kona-ba libertasaun uluk liu, libertasaun husi moris-atan iha Ejitu. Maibé rekordasaun kona-ba realidade ne'e la bele sai hanesan halai ida nostalgja nian ba tempu uluk, hodi hakmatek iha saudade, subar an ida husi ta'uk tempu presente nian... Lembransa tempu uluk nian sai válida bainhira haboot ema nia esperansa no prepara ba futuro foun ida. Iha Maromak nia asaun libertadora ba nia Povu ne'ebé faraó hanehan, judeu fiar-na'in deskobre padraun ida: Maromak ne'ebé halo nune'e mak Maromak ida ne'ebé la tolera opresaun no hamriik iha ema sira ne'ebé terus ninia sorin, sei hatudu nia An hodi hala'o salvasaun ba Povu ne'ebé moris iha eskravidaun. Defaktu –profeta hateten – Maromak libertadór ne'ebé ita fiar bá no iha ne'ebé ita tau ita-nia esperansa la kleur tan sei mai so'i. Besik daudaun ona tempu ézodu foun, libertasaun foun.

Libertasaun ne'e sei sai boot tebes liufali ida antigu: Povu sei liu husi dalan fasil bainhira fila ba Rai Promesa no sei la hasoru hamlaha no hamrook iha rai-fuik maran tanba Jahwéh sei halo mota suli iha rai-fuik maran. Maromak nia atuasaun sei hatudu momoos, nia domin no

salvasaun ba nia Povu. Haree Jahwéh nia hahalok boot, Povu sei foti konxiénsia katak nia mak Povu eleitu no sei fó resposta akeduada: hahí Maromak ba prezente sira nia simu.

## **LEITURA II – Filip 3,8-14**

Surat ba ema Filipense sira mak surat ida nakonu ho domin no laran-luak husi Paulo ba ninia belun sira iha Filipos. Sarani sira sidade ne'e nian, tanba preokupa ho Paulo nia situasaun, haruka ba nia osan no membru ida comunidade nian (Epafrodito), ne'ebé tau matan ba Paulo no akompaña nia iha ninia solidaun iha dadur laran. Ho fuan nakonu ho domin, Paulo agradese ninia oan doben sira husi Filipos; no, husi parte seluk, fó hanoin sira atu keta husik "asu sira", ema sira ne'ebé halo buat aat lori sira ba dalan laloos (Flp 3,2), sira ne'ebé, iha Filipos nune'e mós iha fatin seluk kari mak dúvida no konfuzau. Sira ne'e mak sarani-judeu sira ne'ebé hakarak hatama sirkunsizaun no obediénsia ba Lei Moisés nian (Flp 3,2). Testu ohin nian halo parte diskursu polémika nian kontra inimigu "judaizante" sira-ne'e (kf. Flp 3). Paulo husu Filipense sira atu keta husik pregadór falsu sira-ne'e lohi sira, sira ne'ebé foti-an ho título glória nian, no haluha tiha katak Kristu de'it mak importante.

### *MENSAJEN*

Paulo halo polémika hasoru judeu gabasola sira hodi hatudu ninia ezemplu rasik. Nia iha razaun barak liután sira seluk atu apresenta ninia título oioin glória nian (nia simu sirkunsizaun liutiha loran ualu ninia moris, ebreu nia oan, husi tribu Benjamim nian; nia uluk farizeu ida no moris loloos tuir Lei – kf. Flp 3,5-6); maibé buat ida mesak ne'ebé sai ninia interese – basá ne'e de'it mak iha efikásia salvasaun nian – koñese Jezús Kristu. Liafuan koñese no koñesimentu iha ne'e ninia signifikadu tuir tradisaun bíblika mak "tama iha komunaun moris no destinu nian" ho ema ida. Buat ne'ebé agora nia buka no fundamentál liu mak identifika nia an ho Kristu, atu hamutuk ho Nia bele moris hi'as ba moris foun. Filipense sira – no fiar-na'in sira tempu hotu nian – sei halo di'ak se banati tuir Paulo no haluha buat seluk (sirkunsizaun, ritu Lei nian, título glória nian mak folin-laek/prejuizu ka foer – vers. 8). Identifikasaun ho Kristu de'it, komuñau moris no destinu nian ho Kristu mak importante; hodi moris tuir Kristu nia ezemplu iha saran an, iha doasaun, iha domin ne'ebé serví maun-alin sira mak lori ba morsi-hi'as, ba vida foun.

Iha tan buat ida importante: Paulo konxiente katak sai hanesan Kristu iha moris no destinu implika esforsu ida halo loran ba loran, no nunca hotu; bele mós hasoru frakasu, basá ita-nia foti-an no egoíзму nafatin hafuhu no dalan saran an no doasaun nian mak dalan ezijente liu. Maibé ne'e de'it mak dalan posivel mesak, ida mesak ne'ebé iha sentidu, ba sira ne'ebé hakarak deskobre novidade Kristu nian no hadomi Nia. Sé mak hakarak to'o ba moris foun, moris-hi'as, tenke tuir dalan ida-ne'e.

## **EVANJELLU – Jo 8,1-11**

Unidade literária ida-ne'e, foun la pertense ba Evanjellu João nian: nia dezliga tiha kontestu Jo 7-8, la soi karakteristik estilu João nian no ninia konteúdu la enkaixa iha Evanjellu ne'e (ne'ebé la tau interese ba tipu problema ida-ne'e nian). Aleinde ne'e, manuskritu antigu sira la hatama nia iha Evanjellu; no Padre sira Igreja nian ladún halo referénsia ba espizódiu ne'e. Manuskritu seluk tau nia iha Evanjellu, maibé iha fatin lahanesan, porezemplu, iha finál Evanjellu nian – hanesan versaun moderna Bíblia balun halo. Iha série ida manuskritu sira-nian, ita hetan iha Evanjellu Lucas nian (liutiha Lc 21,38),

ne'ebé sai fatin adekuadu liu, tanba Lucas nia interese mak destaka Jezús nia laran-sadia. Pasajen ne'e mak tradisaun independente ida ne'ebé, Kreda konsidera inspirasaun Maromak nian: nune'e mak hetan konsiderasaun nu'udar "Maromak nia Liafuan".

Buat ne'ebé akontese iha pasajen ne'e mak ita hamriik iha feto ida ne'ebé halo sala adultériu. Tuir Lv 20,10 e Dt 22,22-24, feto ne'e tenke hetan mate. Tenke aplika ka la aplika Lei? Ne'e mak problema ne'ebé judeu sira prezenta ba Jezús.

## MENSAJEN

Evanjellu ohin nian haktuir Jezús iha feto maksalak ida nia oin, ne'ebé tuir Lei merese mate. Ba eskriba no farizeu sira, ne'e mak oportunidade di'ak atu koko Jezús ninia hanorin ne'e loos ka lae no ninia fidelidade ba ezijénsia sira Lei nian; ba Jezús fali, ne'e mak momentu atu hatudu Maromak nia atitude hasoru salan no ema maksalak sira.

Hato'o tiha kestaun ne'e, Jezús la buka hamenus salan nia todan ka fó deskulpa ba feto maksalak ninia hahalok. Nia hatene katak salan la'ós dalan ne'ebé ita tenke simu, basá hamosu moris triste, hasai ksolok no halakon dame... Maibé Nia mós la aseita atu tuir Lei ida ne'ebé, hodi Maromak nia naran, hamosu mate. Tanba Maromak nia eskema/hanoin diferente husi Lei nia eskema, Jezús halo silénsiu ba minutu ruma no hakerek iha rai, hanesan fó tempu ba partisipante sira atu komprende buat ne'ebé sai kauza iha ne'e. Finalmente, Nia konvida kesar-na'in/ akuzadór sira atu foti konxiénsia katak salan mak konsekuénsia ida husi ita-nia limite no frajilidade no katak Maromak komprende limitasaun no frajilidade sira-ne'e: "Imi ida ne'ebé sala la iha, nia mak tuda uluk feto ne'e!". No Nia kontinua hakerek iha rai, hodi hein katak feto nia akuzadór sira interioriza Maromak nia lójika – lójika ida toleránsia no komprensaun nian. Bainhira eskriba no farizeu sira hadook an hotu, Jezús la husu pergunta ida se nia arrepende ka lae ba ninia salan sira: nia konvida de'it feto ne'e atu tuir dalan foun, dalan liberdade no dame nian ("la'o bá no keta sala tan").

Maromak nia lójika la'ós lójika ida mate nian maibé lójika ida moris nian; Maromak nia proposta ba ema sira liuhusi Jezús la realiza hodi elimina ema sira ne'ebé halo salan, maibé liu husi konvite ba moris foun, ba konversaun, ba transformasaun, ba libertasaun husi buat hotu ne'ebé hanehan no hahata (halo ema sai atan); no harahun ka oho ema hodi Maromak nia naran ka hodi morál naran de'it nia naran mak hahalok hasoru Maromak moris no domin nian, ne'ebé hakarak de'it mak ema nia realizasaun tomak.

Epizódiu hatudu mós, ema nia ipokrizia no laran-toos, prontu nafatin atu tesi lia no kondena ema seluk, Jezús denuncia, iha ne'e, lójika ema sira ne'ebé sente sira nia an loos no la sala, auto-perfeito nian, hodi la rekoñese, ho haraik-an no simplisidade, katak ita hotu imperfeito no limitadu. Presiza rekoñese, ho haraik-an no simplisidade katak ita hotu presiza Maromak nia domin no laran-sadia atu bele sai Ema Foun. Atitude ida mesak ne'ebé iha sentidu, iha eskema ida-ne'e, mak asume hahalok toleránsia no laran-sadia nian ne'ebé Maromak soi ba ema hotu.

Iha Jezús nia atitude, bele haree momoos Maromak nia laran-luak ba sira ne'ebé teolojia ofisiál tau iha ninin, Ema maksalak públiku sira, hetan iha Jezús sinál ida husi Maromak ne'ebé hadomi sira no dehan: "Ha'u la tesi lia ba ó". Jezús fó dignidade ba ema sira-ne'e, halo sira sai ema livre no hatudu ba sira dalan ba moris foun. Maromak nia dinámika mak dinámika ida laran-sadia nian, tanba domin de'it mak bele transforma no permite superasaun ba limite umanu sira. Ida-ne'e mak realidade Reinu Maromak nian.